

ԳԵՎՈՐԳ ԿԵՍՈՅԱՆ, ԵՎԳԵՆԵ ՄՈՒՐԱԴՅԱՆ

ՀԱԱ

ՋԱԼԱԼՕՂԼՈՒ ԴՊՐՈՑԻ ԳՈՐԾՈՒՆԵՌՈՒԹՅՈՒՆԸ ԻՒՄԱԴՐՈՒՄԻՑ ՄԻՆՉԵՎ ԱՌԱՋԻՆ ԱՇԽԱՐՀԱՍԱՐՏ

Նայ իրականություն մեջ դպրոցների ստեղծման գործում իր անուրա-
նալի ավանդն ունի Հայ Առաքելական Սուրբ Եկեղեցին, որը մշտա-
պես հոգ է տարել դպրոցական կյանքի կանոնավոր ընթացքի եւ առա-
ջընթացի մասին: Եկեղեցու ուշադրության արդյունք էր նաեւ Զալալօղ-
լու¹ ծխական-եկեղեցական դպրոցի հիմնումը:

Դպրոցաշինական կյանքը վերելք է ապրել ԺԹ. դարում. այս գործըն-
թացից անմասն չի մնացել նաեւ Բորչալուի գավառի Զալալօղլին²: 1878
թ. որոշվում է գյուղում հիմնել արական միդասյա դպրոց³: Հաջորդ տա-
րում որոշվում է հիմնել նաեւ իգական միդասյա դպրոց⁴, կրթություն
ստանալու հնարավորություն ստեղծելով երկու սեռի ներկայացուցիչնե-
րի համար: Դպրոցի կանոնավոր գործունեությունն սկսել է 1879-1880
ուսումնական տարվանից, որը եւ, կարծում ենք, հիմք է ծառայել արխի-
վային որոշ փաստաթղթերում դպրոցի հիմնադրման թվականը 1879 նշե-
լու համար: Նշենք նաեւ, որ Զալալօղլու դպրոցը Բորչալուի գավառում
բացված դպրոցներից առաջինն է⁵:

Առկա է թյուրըմբռնում՝ դպրոցի հիմնադրի հետ կապված. գյուղի
բնակչությունը պնդում է, որ այն հիմնադրվել է Տիգրան Տեր-Դավթյա-
նի⁶ կողմից: Փաստաթղթերը ցույց են տալիս, որ Տ. Տեր-Դավթյանի եւ

¹ 1923 թ. վերանվանվել է Ստեփանավան՝ ի պատիվ Ստեփան Շահումյանի:

² Զալալօղլին ընդգրկված է եղել Թիֆլիսի նահանգի Բորչալուի գավառի Լոռու շրջանում՝
Վրաստանի եւ Իմերեթի թեմի ենթակայության ներքո (այժմ Ստեփանավանի տարածքում
է):

³ Տե՛ս ՀՀ ազգային արխիվ, ֆ. 637, ց. 1, գ. 286, թ. 66:

⁴ Տե՛ս անդ, թ. 67:

⁵ Տե՛ս անդ, ֆ. 56, ց. 1, գ. 7064, թ. 15:

⁶ Տիգրան Տեր-Դավթյանը ծնվել է 1853 թ. Տիգրիս քաղաքի Բեթղեհեմ թաղի Ս. Աստ-
վածածին եկեղեցու քահանա Հովհաննես Դավթյանի եւ Կատարինեի ընտանիքում:
Եղել է դպիր նույն եկեղեցում, երգի խմբի ղեկավար, քարոզիչ, Վրաստանի եւ Իմերեթի
թեմի հայկական դպրոցների տեսչի օգնական, Մարց գյուղի եկեղեցու կալվածքների

դպրոցի կապը սահմանափակվում է դպրոցի համար նախատեսված տան առքուվաճառքի շրջանակում: 1879 թ. դպրոցի հոգաբարձուները (Եզոր Քալանթարյան, Սարգիս Տեր-Գրիգորյան, Մովսես Խանադյան, Սարգիս Հակոբյան) Տ. Տեր-Դավթյանից 2000 ռուբլով գնում են նրա տունը՝ դպրոց հիմնելու նպատակով⁷: Եթե Տ. Տեր-Դավթյանը հիմնադիրը լիներ, նա ոչ թե կվաճառեր, այլ կնվիրեր իր տունը: Ավելին՝ 1887 թ. վերաբացումից հետո դպրոցը գործել է վարձակալված շենքում: Այսինքն՝ Տ. Տեր-Դավթյանից գնված տունը հետ է վերադարձվել⁸: Հաջորդ հանգամանքը, որը ժխտում է Տ. Տեր-Դավթյանի՝ դպրոցի հիմնադիր լինելու վարկածը, այն է՝ դպրոցի հիմնադիրները կաթողիկոսական կոնդակով դառնում են հոգաբարձուների խորհրդի պատվավոր նախագահ: Ինչպես տեսնում ենք, վերը նշված հոգաբարձուների շարքում Տ. Տեր-Դավթյանի անունն առկա է: Երրորդ փաստը 1893-1894 թթ. տարեկան տեղեկագրի հաղորդած տեղեկությունն է, համաձայն որի՝ Զալալօղլու թե՛ արական եւ թե՛ իգական դպրոցները բացել է «գիւղական հասարակութիւնը իւր հաշուով»⁹:

Ցարական կառավարությունը, ցավոք, վարում էր կոշտ քաղաքականություն ազգային փոքրամասնությունների կրթամշակութային կյանքի հանդեպ, որի հետեւանքով ազգային կրթօջախները պարբերաբար փակվում էին: Այս քայլով կայսրությունը նպատակ ուներ ազգերին կտրել իրենց մշակույթից եւ այդպիսով արագացնել նրանց ուծացումը: Բարեբախտաբար, մենք՝ հայերս, պայքարել ենք մեր ինքնության դեմ կատարված այդ ոտնձգությունների դեմ եւ դպրոցների ապօրինի փակմանը հակադրել դրանց վերաբացումը:

Զալալօղլու դպրոցն առաջին անգամ փակվել է 1880-ական թվականների կեսերին: Վրաստանի եւ Իմերեթի թեմի հայկական դպրոցների վերատեսչի օգնական Տ. Տեր-Դավթյանի՝ թեմի առաջնորդին ուղարկած 1885 թ. ապրիլի 3-ի գրություն մեջ կարդում ենք. «...ուսումնարանք Զա-

կառավարիչ (2 անգամ քահանա ձեռնադրվելու անհաջող փորձ է կատարել):

⁷ Տե՛ս անդ, ֆ. 53, ց. 1, գ. 3997, թ. 136 եւ 139:

⁸ 1886 թ. դպրոցի հոգաբարձուների եւ գյուղի հասարակության կողմից ընտրված հաշվետեսների միջեւ կնքված համաձայնությունից պարզ է դառնում, որ տան գնման համար նախատեսված 2000 ռուբլին չի վճարվել: Սույն համաձայնությամբ պայմանավորվում են, որ հոգաբարձուները պարտավորվում են վճարել 1000 ռուբլի, իսկ մյուս կեսը պետք է «գեղջվեր» Տ. Տեր-Դավթյանի կողմից: Կարելի է ենթադրել, որ նոր պայմանների հետ Տ. Տեր-Դավթյանը չի համաձայնել, եւ տունը վերադարձվել է:

⁹ Անդ, ֆ. 637, ց. 1, գ. 286, թ. 66 եւ 67:

լալ-օղլուոյ փակեցան ի ձեռն պրիստաւին Լօռուոյ՝ ի 27 մարտի»¹⁰:

Գործունեութեան առաջին շրջանում Ջալալօղլու դպրոցն աշակերտների թվաքանակով եղել է առաջատար դպրոցների շարքում: 1880-1881 ուս. տարում դպրոցում սովորել է 42¹¹, 1881-1882-ին՝ 42¹², 1882-1883-ին՝ 60¹³ աշակերտ:

Արդեն նշվեց, որ դպրոցների փակումից հետո ձեռնարկվում էին համառ քայլեր դրանց վերաբացման ուղղությամբ: 1887 թ. հոկտեմբերի 29-ին Վրացա-իմերեթական թեմի առաջնորդը գրություն է ուղարկում Ջալալօղլի գյուղի տանուտեր Սահակ Սահակյանին, որով հանձնարարում է «յորդորել զժողովուրդն անկասկած լինել վասն հոգատարութեան մերոյ ի բացումն ծխի. (ծխական - Գ. Կ., Ե. Մ.) դպրոցաց տեղւոյդ»¹⁴: Նկատելի է, սակայն, որ դպրոցը Լոռու գավառում վերաբացված դպրոցների շարքում առաջիններից է: Շուրջվերի գործակալի՝ թեմի առաջնորդին գրած պատասխան նամակում կարդում ենք. «...ի Լօռուոյ գործակալութեան գերկուս միայն ունիմք ծխական դպրոցս՝ ի Ջալալ-օղլի եւ ի Դսեղ»¹⁵:

1887 թ. դեկտեմբերի 15-ին վերաբացվում է գյուղի դպրոցը, որը նախատեսված էր միայն տղաների համար: Այն ուներ 70 աշակերտ, դասերն անցկացվում էին վարձակալված «մասնաւոր շինութեան մէջ»: Այս շրջանում դպրոցում դասավանդել են Մինաս Անդրեասի Խուբլարյանցը, Մկրտիչ Տեր-Հակոբյանը, Գրիգոր Հովհաննեսի Պետրոսյանցը¹⁶: Դպրոցում սովորել են հասարակութեան տարբեր խավերի ներկայացուցիչների երեխաներ: 1888 թ. կազմված տեղեկագրում նշվում է, որ դպրոցի 71 աշակերտներից 1-ը եղել է հոգեւորականի որդի, 2-ը՝ ազնվականի, 18-ը՝ վաճառականի, 8-ը՝ արհեստավորի, 42-ը՝ երկրագործի¹⁷:

1888 թ. վերաբացվել է նաեւ գյուղի իգական դպրոցը, որն այս անգամ գոյատևել է շատ կարճ ժամանակ: Այն եւս գործել է վարձակալված մասնավոր տան մէջ եւ ունեցել է 1 ուսուցիչ՝ Մարգարիտ Մարգարյանց¹⁸: Հաջորդ

¹⁰ Անդ, ֆ. 53, ց. 1, գ. 3998, թ. 59:

¹¹ Տէս անդ, ֆ. 56, ց. 1, գ. 7064, թ. 15:

¹² Տէս անդ, թ. 24:

¹³ Տէս անդ, թ. 40 շրջերես:

¹⁴ Անդ, ֆ. 35, ց. 1, գ. 9, թ. 12:

¹⁵ Անդ, գ. 763, թ. 6:

¹⁶ Տէս անդ, ֆ. 53, ց. 1, գ. 4004, թ. 68-69:

¹⁷ Տէս անդ, ֆ. 48, ց. 1, գ. 305, թ. 11:

¹⁸ Տէս անդ, ֆ. 35, ց. 1, գ. 8, թ. 55 շրջ.-56:

տարի Զալալօղլու երկսեռ դպրոցների հոգաբարձությունը դիմում է Վրացա-իմերեթական թեմի առաջնորդին՝ իգական դպրոցի գործունեությունը դադարեցնելու խնդրանքով. դա բացատրվում էր Ֆինանսական համապատասխան միջոցներ չունենալով: Թեմի առաջնորդը պատասխան գրությամբ բավարարում է խնդրանքը, որով իգական դպրոցը փակվում է¹⁹:

Իգական դպրոցը զարթոնք է ապրում 1890-ական թվականների սկզբին: 1893 թ. օգոստոսի 22-ին Զալալօղլու դպրոցի հոգաբարձուները դիմում են Վրաստանի եւ Իմերեթի հայկական դպրոցների տեսչին. հայտնելով գյուղի բնակչության՝ իգական դպրոցը վերաբացելու ցանկություն մասին՝ խնդրում էին թույլտվություն ստանալու համար միջնորդել կաթողիկոսի առջեւ²⁰: 1893 թ. սեպտեմբերի 3-ին թեմակալ առաջնորդը հայտնում է հոգաբարձուներին, որ Ամենայն Հայոց Հայրապետից ստացել է թույլտվություն եւ «այսու թույլատրում եմ գիւղումդ օրիորդաց միգասեան դպրոց բանալ»²¹:

Դպրոցը վերաբացվում է 1893 թ. սեպտեմբերի 30-ին, իսկ դասերը կանոնավոր ընթացքի մեջ են մտնում հոկտեմբերի 15-ից. կրթօջախն ունեցել է 40 աշակերտուհի: Դպրոցում դասավանդելու էին Եղիա Զոհրաբյանցը, Գարեգին Շահինյանցը, Արուսյակ Հեջուբյանցը, Մկրտիչ քհն. Տեր-Հակոբյանցը²²: Դպրոցն ունենալու էր 2 բաժանմունք եւ գործելու էր Միխայել Սահակյանից վարձած տանը²³. հետագայում բացվելու էր նաեւ երրորդ բաժանմունքը:

1891 թ. տեղի են ունենում կառուցվածքային փոփոխություններ գյուղի արական դպրոցում: Ուսուցիչ Ալեքսանդր Բաղչինյանցին հանձնարարվում է աշակերտներին բաժանել առանձին խմբերի: Ստեղծվում են Ա., Բ. եւ Գ. բաժանմունքներ, որոնք ունեին իրենց առանձին ծրագրերը²⁴: Աշակերտների թվաքանակի ավելացմամբ պայմանավորված՝ 1910 թ. ստեղծվում է նաեւ 4-րդ բաժանմունքը²⁵: 1891-ից դպրոցը գործել է Մովսես Սարիբեկյանից վարձած տանը²⁶:

¹⁹ Տէս անդ, ֆ. 53, ց. 1, գ. 4006, թ. 225-226:

²⁰ Տէս անդ, ֆ. 637, ց. 1, գ. 290, թ. 2-3:

²¹ Անդ, թ. 1:

²² Տէս անդ, գ. 293, թ. 74:

²³ Տէս անդ, գ. 286, թ. 67:

²⁴ Տէս անդ, գ. 106, թ. 19-19 շրջ.:

²⁵ Տէս անդ, ֆ. 35, ց. 1, գ. 658, թ. 7:

²⁶ Տէս անդ, ֆ. 637, ց. 1, գ. 286, թ. 66:

Նախորդ տարիների համեմատ ավելացել էր աշակերտների թվաքանակը: 1893-1894 ուս. տարում դպրոցում սովորում էին 84 տղա եւ 40 աղջիկ, հաջորդ ուս. տարում՝ 84 տղա եւ 42 աղջիկ²⁷: Դպրոցում դասավանդվում էին կրոն, երգեցողություն, հայոց լեզու եւ վայելչագրություն, ռուսաց լեզու եւ վայելչագրություն, թվաբանություն, գծագրություն, պատմություն, աշխարհագրություն, մեղվաբուծություն, միայն աղջիկների համար նաեւ ձեռագործություն առարկաները: Դպրոցում կազմակերպվում էին նաեւ տարբեր միջոցառումներ: 1893-1894 ուս. տարում թե՛ արական, թե՛ իգական դպրոցներում կազմակերպվել են միջոցառումներ օրիորդաց դպրոցի վերաբացման եւ Ս. Թադեոսի ու Ս. Բարդուղիմեոսի տոները նշելու համար:

Դպրոցների փակման քաղաքականությունը ցարական կառավարությունը վերսկսում է 1890-ական թվականների կեսերին, որի հետեւանքով 1896 թ. փետրվարի 12-ին փակվում է նաեւ Ջալալօղլու դպրոցը: Այդ օրը դպրոցի ավագ ուսուցչի պաշտոնակատար Արիստակես քհն. Աբովյանցը Վրաստանի եւ Իմերեթի թեմի հայկական դպրոցների տեսչին հայտնում է. «Շտապում ենք, ցաւով սրտի, ածել ի գիտութիւն բարեկրօնութեանդ, այսօրուանից իմ առաջնորդութեանն յանձնուած ուսումնարաններում ուսմունքն ընդհատելու ստիպուեցանք»²⁸:

Արխիվային փաստաթղթերում չկան տեղեկություններ 1896-1905 թթ. ընթացքում Ջալալօղլու դպրոցի գործունեության վերաբերյալ: Պետք է ենթադրել, որ այս ընթացքում դպրոցը փակված է մնացել: Այն վերաբացելու քայլեր են ձեռնարկվել արդեն 1905 թ., երբ Ռուսաստանի ցարը չեղյալ է հայտարարել իր կողմից 1903 թ. հունիսի 12-ին ընդունված՝ եկեղեցապատկան կալվածքների բռնագրավման վերաբերյալ օրենքը, որով հնարավորություն ստեղծվեց դպրոցական կյանքի վերակենդանացման համար²⁹:

Լոռու գործակալ Հովհաննես քհն. Վերանյանի կողմից 1906 թ. փետրվարին կազմված ցուցակից պարզ է դառնում, որ Ջալալօղլու երկսեռ դպրոցը վերաբացվել է 1905 թ. նոյեմբերի 10-ին³⁰ եւ իր գործունեությունը

²⁷ Տէս անդ., գ. 298, թ. 50 եւ 66:

²⁸ Տէս անդ., գ. 342, թ. 24:

²⁹ Եկեղեցական կալվածքների բռնագրավումը, բնականաբար, ենթադրում էր հարված եկեղեցական եկամուտներին, որը եւ հանգեցնում էր դպրոցական կյանքի խաթարմանը, քանի որ դպրոցները պահվում էին այդ եկամուտներով:

³⁰ Տէս անդ., ֆ. 35, ց. 1, գ. 175, թ. 24:

շարունակել մինչև Առաջին աշխարհամարտը: 1906-1907 ուս. տարում դպրոցում սովորել են 135 տղա եւ 106 աղջիկ³¹, իսկ հաջորդ տարում՝ համապատասխանաբար 123 եւ 117 աշակերտ³²:

Դպրոցի գործունեությունը ընթացքում դժվար լուծելի է եղել անհրաժեշտ պայմաններ ունեցող դպրոցական չենք ունենալու խնդիրը: Սկզբնական շրջանում դպրոցը գործել է տարբեր անհատներից վարձակալած տներում, որոնք չեն ունեցել դպրոցական չենքի համար անհրաժեշտ պայմաններ: 1894 թ. հունվարի 30-ին Վրաստանի եւ Իմերեթի թեմի հայկական դպրոցների տեսչին ուղարկված գրությունը դպրոցի ավագ ուսուցիչ Եղիա Զոհրաբյանը հայտնում է. «Դպրոցների համար վարձուած շինությունները դպրոց լինելու համարություններից զուրկ են... մտադրություն կայ դարնանը դպրոցապատկան ընդարձակ գետնի վրայ նոր շինություն կառուցանելու»³³: Շենքերի անհամարությունը վերաբերյալ առավել մանրամասն տեղեկություններ են հայտնում 1893-1894 թթ. համար կազմված տեղեկագրերը, ըստ որոնց՝ արական դպրոցի համար վարձված չենքը ունեցել է «2 փոքր, վատ լուսաւորուած սենեակ», իսկ իգականինը՝ «սենեակը խիստ ցած է եւ լուսաւորութիւնը՝ անկանոն»³⁴: Դպրոցական սեփական չենք կառուցելու մտադրությունը անկատար մնաց՝ դպրոցների փակմամբ պայմանավորված:

1905 թ. վերաբացումից հետո ձեռնարկվում են քայլեր դպրոցական չենքի շինարարության կազմակերպման ուղղությամբ: 1907 թ. տեղեկագրի համաձայն՝ դպրոցն ունեցել է սեփական չենք³⁵, որը եղել է ոչ ավարտուն վիճակում: Դպրոցական չենքի կառուցման գործում մեծ ավանդ են ունեցել Արշակ Դավթյանի կինը՝ Նատալյա Դավթյան-Հովհաննիսյանը, եւ դստերը: 1906-ից՝ Արշակ Դավթյանի մահից հետո, կինը եւ դուստրերը նրա հիշատակը հավերժացնելու համար դպրոցի հոգաբարձության են հատկացնում 7000 ռուբլի գումար՝ դպրոցական չենքի կառուցման համար³⁶: 1910 թ. մարտի 24-ին Վրաստանի եւ Իմերեթի թեմի առաջնորդը գրություն է ուղարկում Նատալյա Դավթյանցին, որով տեղեկացնում է, որ վերջինս պարգևատրվել է կաթողիկոսական երախտագիտության

³¹ ՏՆՍ անդ, գ. 174, թ. 22 շրջ.-23:

³² ՏՆՍ անդ, ֆ. 56, ց. 15, գ. 182, թ. 39 շրջ.-40:

³³ ՏՆՍ անդ, ֆ. 637, ց. 1, գ. 271, թ. 25:

³⁴ Անդ, գ. 286, թ. 66-67:

³⁵ ՏՆՍ անդ, ֆ. 35, ց. 1, գ. 174, թ. 131:

³⁶ ՏՆՍ անդ, գ. 572, թ. 11. նաեւ՝ գ. 445, թ. 9:

կոնդակով եւ նշանակվել դպրոցի հոգաբարձուների խորհրդի պատվավոր անդամ³⁷:

Իր գործունեությունը ընթացքում դպրոցն ունեցել է դժվարություններ՝ կապված ֆինանսական բավարար միջոցների հայթայթման հետ: Դպրոցի համար դրամական միջոցների աղբյուրներ էին գյուղի բնակչության նվիրատվությունները, թոշակադրամները, եկեղեցական օգնությունը եւ ձեռագործերի վաճառքից ստացված գումարները:

Հոգաբարձուների եւ գյուղացիների միջեւ ձեռքբերված պայմանավորվածության համաձայն՝ դպրոցի պահպանության համար գյուղացիները յուրաքանչյուր տարի դպրոցին տրամադրելու էին որոշակի գումար: Կապված դպրոցի տվյալ տարվա ծախսերի հետ՝ այդ չափը կարող էր փոփոխվել:

Թոշակադրամները վճարվում էին աշակերտ-աշակերտուհիների կողմից՝ որպես տարեկան վարձ: Այն կազմում էր շուրջ 4 ռուբլի³⁸: Կրթությունը բոլորին հասանելի դարձնելու նպատակով դպրոցում հնարավորություն է ստեղծվել ուսանելու «ձրիավարժ» սկզբունքով, այսինքն՝ առանց թոշակադրամի վճարման:

Դպրոցի առաջին վերաբացումից հետո եկեղեցին իր եկամուտներից գումար է հատկացրել դպրոցի գործունեության ապահովման համար: 1888 թ. նոյեմբերի 10-ի գրությունը Զալալօղլու երկսեռ դպրոցի հոգաբարձությունը, նախապես ներկայացնելով դպրոցի նյութական ծանր վիճակը, Վրաստանի եւ Իմերեթի թեմի առաջնորդին խնդրում է, որ տեղի եկեղեցու եկամուտների մի մաս հատկացնի դպրոցին³⁹: Թեմակալ առաջնորդը պատասխան գրությունը հայտնում է, որ այսուհետ դպրոցին է հատկացվելու մոմավաճառությունից ստացված եկամուտից տարեկան 120 ռուբլի⁴⁰:

Դպրոցը նյութական որոշ միջոցներ էր ստանում ձեռագործերի վաճառքից:

Գումարների հավաքագրման հարցում դպրոցի հոգաբարձությունը հաճախ հանդիպում էր դժվարությունների, եւ կուտակվում էին

³⁷ Տե՛ս անդ, թ. 13:

³⁸ 1894-1895 ուս. տարում դպրոցում սովորող 128 աշակերտներից հավաքվել է 600 ռուբլի թոշակադրամ, որը 1 աշակերտի հաշվով կազմում է 4 ռուբլի (եթե նկատի ունենանք նաեւ «ձրիավարժ» աշակերտների առկայությունը). անդ, գ. 77, թ. 124 շրջ.:

³⁹ Տե՛ս անդ, ֆ. 53, ց. 1, գ. 4005, թ. 155 շրջ.:

⁴⁰ Տե՛ս անդ, թ. 159:

մեծ պարտքեր: Խնդրից անհանգստացած՝ դպրոցի հոգաբարձու թյունը 1888 թ. նոյեմբերի 10-ին դիմում է Վրաստանի եւ Իմերեթի թեմի առաջնորդին. «Սրբազան Հայր, արդէն տասներորդ տարին է, որ պարտապանների վրայ մնում է յիշեալ դրամագլուխը՝ առանց առնելու կամ մուրհակները փոխելու (մինչեւ այժմ ոչ մի պարտապան կամք չէ յայտնում վճարելու իւր պարտքը): Ուստի հոգաբարձութիւնս հարմար է տեսնում, որ դատաստանական ճանապարհով առնուի պարտապաններից դրամագլխի գոնէ մի մասը»⁴¹: Դատական գործընթացը տեղի է ունենում 1889 թ., որը բավարարում է դպրոցի պահանջը եւ հնարավորութիւն ընձեռում հավաքելու պարտքերը⁴²:

Ջալալօղլու դպրոցում որպէս ուսուցիչ աշխատել են Տիգրան Վերանյանը, Գեւորգ Կուլիջանյանը, Մարգարիտ Մարգարյանը, Եսայի քհն. Տեր-Աբովյանը, Մկրտիչ քհն. Տեր-Հակոբյանը, Արշակ Ագաբյանը, Եղիա Զոհրաբյանը, Գարեգին Շահինյանը, Արուսյակ Հեջուբյանը, Ալեքսանդր Բաղլինյանը, Անդրեաս Միրաբյանը, Արիստակէս քհն. Տեր-Աբովյանը, Միքայել Տեր-Մարտիրոսյանը, Սարգիս Սահակյանը, Նատալյա Կարապետյանը, Սարգիս Խանադյանը, Խորեն Երիցյանը, Գեղամ Տեր-Խաչատրյանը, Անուշավան Զոհրաբյանը եւ ուրիշներ:

Դպրոցի հոգաբարձուների խորհրդի անդամներ են եղել Դանիել Զիթյանը, Նավասարդ Զաղինյանը, Նիկողայոս Հայրապետյանը, Բարսեղ Մարտիրոսյանը, Մկրտիչ Ստեփանյանը, Աղաջան Սահակյանը, Մկրտիչ Վարդապարյանը, Եսայի քհն. Տեր-Աբովյանը, Հայրապետ Տեր-Հակոբյանը, Լեւոն Մկրտչյանը, Մկրտիչ Վարդապարյանը, Գրիգոր Ներկարարյանը եւ ուրիշներ:

Այսպիսով, Ջալալօղլու դպրոցը, հաղթահարելով բազմաթիւ խոչընդոտներ, կարողացել է ապահովել մատաղ սերնդի կրթութիւնը. ընդ որում, ստեղծվել են գրեթե հավասար պայմաններ տղաների եւ աղջիկների համար⁴³: Կրթութիւնը եղել է բազմաբովանդակ՝ կրօնից մինչեւ լեզուներ, պատմութիւն, աշխարհագրութիւնից մինչեւ գործնական գիտելիքների փոխանցում:

⁴¹ Անդ, թ. 155:

⁴² Տէս անդ, գ. 4008, թ. 1-85:

⁴³ Սկզբնական շրջանում տղաների համեմատ աղջիկների թիվը նվազ է եղել. այսպէս՝ 1893-1894 թթ. դպրոց են հաճախել 84 տղա եւ 40 աղջիկ այն դեպքում, երբ գյուղի տղամարդկանց եւ կանանց թվաքանակը գրեթէ հավասար է եղել՝ համապատասխանաբար 790 եւ 780. տէս անդ, ֆ. 637, g. 1, գ. 286, թ. 67:

РЕЗЮМЕ

Джалалоглинская школа была основана в 1878-1879 гг. и организовала обучение представителей обоих полов в равной степени. Во время своей деятельности, школа столкнулась с множеством трудностей: начиная с нехватки финансовых проблем до периодического закрытия. Школа сумела преодолеть все эти трудности и дала достаточное образование. В школе преподавали армянский и русский языки, арифметику, историю, религию, пчеловодство и другие предметы. Преподавали учителя, которые прошли педагогическое обучение.

SUMMARY

The Jalalogli school was founded in 1878-1879 and organized the educational process of representatives of both sexes equally. During its activity, the school faced many difficulties: beginning with financial insufficiency to the periodic closure. However, the school managed to overcome all these difficulties and provided adequate education. Armenian and Russian languages, arithmetics, history, religion, apiculture and other subjects were taught there. Teachers with the experience of pedagogical trainings taught at school.

